



SAOPŠTENJE ZA MEDIJE

Nova vlast, stara praksa!

Sarajevo, 03.02.2023.

Nagovještaj poništavanja provedenih konkursnih procedura u policijskim strukturama BiH nije iznenađenje za sve koji i letimično prate dešavanja u političkom obitusu naše svakodnevnice. Još je prihvatljivija takva varijanta, kada vam tu mogućnost servira bivša vlast, koja uslijed svoje nesposobnosti ne okonča procedure i ostavi na cjedilu najbolje rangirane kandidate u redovno provedenoj konkursnoj proceduri.

Ni novi politički dogovor o nacionalnoj ili etničkoj raspodjeli pozicija unutar policijskih struktura, uprkos permanentnom i flagrantom kršenju ljudskih prava i osnovnih sloboda potencijalnih kandidata, ma koliko turobno to zvučalo, ne predstavlja posebnu iznimku u našem političkom ophođenju. Ono što zaista zabrinjava i iritira građane, uprkos nagovještenim i proklamiranim novim političkim paradigmama, javno je licitiranje pojedinih političkih partija o imenovanju svojih kadrovika na mjesta poput direktora Službe za poslove sa strancima. Bez imalo ustručavanja se poručuje da će navodni kadar SDS-a biti smijenjen i na njegovo mjesto postavljen vjerovatno lojalni direktor, ovaj put kadar SNSD-a.

Potpuno ignorisanje demokratskih principa te uloge i nadležnosti Nezavisnog odbora Parlamentarne skupštine BiH, koji je, između ostalog, zadužen za provođenje procedure odabira i predlaganja rukovodilaca policijskih tijela BiH, predstavlja grubo narušavanje i izvrgavanje osnovnih principa vladavine prava. Ujedno, to je i nipodaštavanje legitimne volje zakonodavne vlasti u okviru koje djeluje i polaže račune ovo nezavisno i profesionalno tijelo uspostavljeno davne 2008. godine tokom posljednje reforme policijskih struktura u BiH.

Ne abolirajući sve prethodne vlasti od slične prakse, doduše sa malo profinjenijim manirima i neiznošenjem sličnih stavova u javnosti, ipak se nova garnitura vlasti obavezala da će postupati i raditi u interesu građana. Građani ove države napokon zaslužuju najbolje od onoga što se u ovom trenutku može ponuditi na čelu agencija, koje su zadužene za zaštitu njihovih života i imovine. Uskoro se približava test za novu garnituru vlasti u pogledu praktične implementacije izbornih obećanja o izboru kredibilnih i profesionalnih, a ne podobnih kandidata. Javnost će zasigurno dati svoj sud na osnovu njihovih djela i postupaka, a ne retorike.

S poštovanjem,

dr. sc. Denis Hadžević
predsjednik Centra za sigurnosne studije